

প্রতিদিন কত কিছুই তো ঘটছে জীবনে, ঘটবেও। উত্থান আর পতন প্রতিদিন, প্রতিবেলা। অজস্রবার, অজস্রভাবে... অনেক যন্ত্রণা আর কষ্ট। এরই মাঝে কিছু সুন্দর মুহূর্তও আছে, থাকবে। থাকবে —


অজস্র ভুল,
ভুলের সংশোধন,
অনুতাপ,
আঘাত,
ভালোবাসার বসন্ত,
অভাবের উত্তাপ,
অসুস্থতা,
অনুরাগ,
অতীতের কষ্ট,
ভবিষ্যতের শংকা,
নিজের অযোগ্যতা,
অসহায়ত্ব,
হতাশা,
সুন্দর মানুষদের কাজ দেখা,
হঠাৎ সুন্দর কথা,
শত্রুতামূলক বাক্য,
ষড়যন্ত্র আর কুৎসা,
স্রষ্টার স্মরণে আত্মার পরিতুষ্টি...

এত কিছুর মাঝে আছে আমাদের সেই স্মৃতি — যেখান থেকে এসেছিলাম আমরা, সেখানে ফিরে যাবার তাগিদ। আমাদের বাড়ি ছিল সেই বাগানটি যার নিচে দিয়ে পানির স্রোত বয়ে যায়, যতদূর চোখ যায় শুভ্র সুন্দরের হাতছানি, যেখানে সুগন্ধে মৌ মৌ করে, যেখানে মন জুড়ানো আর মন মাতানো সুন্দর ফুল আর ফল, যেখান থেকে আমাদের বাবা-মায়েরা এসেছিলেন পৃথিবীতে দায়িত্ব কাঁধে নিয়ে।

সেই দায়িত্ব পালন করে যেন **নিজেদের বাড়িতে** ফিরতে পারি...এইতো তো চাওয়া! মাটির পৃথিবীতে এসে ঘটে যাওয়া অজস্র ঘটনায় ডুবে আবার পথ ভুলে আগুনের দেশে যেন যেতে না হয় — সেইই তো অনুপ্রেরণা। আমরা কি ঘরে ফেরার পথে আছি? আমরা কি গত বছর যেমন ক্রোধোন্মত্ত, লোভী, কামুক ছিলাম, আজো আছি? আমরা গত মাসে যেমন হিংসুটে ছিলাম, আজো আছি? আমরা কি নিজেদের উন্নত করতে পারছি? আমাদের বাড়ি ফিরে যেতে হলে তো এসব থেকে যথাসম্ভব মুক্ত হতে হবে, দুনিয়ায় এই ভ্রমণটাতে আমাদের করতে হবে ক্রমাগত উন্নত। প্রতিটি দিন আমরা প্রস্তুতি নিচ্ছি ফিরে যাবার, সেই আপন ঠিকানায় ...

এভাবেই তো জেগে ওঠে আমাদের মনের মাঝে সেই চাওয়া — কবে যাব ফিরে আমাদের আপন ঠিকানায়, কবে যাব ফিরে আমাদের সেই ঘরে, আমাদের জান্নাতে...

আর সবই তো ক্ষণিকের বিভ্রম!!



“তোমরা জেনে রাখ, পার্থিব জীবন ক্রীড়া-কৌতুক, সাজ-সজ্জা, পারস্পরিক অহমিকা এবং ধন ও জনের প্রাচুর্য ব্যতীত আর কিছু নয়....” [সূরা আল হাদিদঃ ২০ :: [পড়ুন](#)]

“প্রত্যেককে মৃত্যুর স্বাদ আস্বাদন করতে হবে। আমি তোমাদেরকে মন্দ ও ভাল দ্বারা পরীক্ষা করে থাকি এবং আমারই কাছে তোমরা প্রত্যাবর্তিত হবে” [সূরা আল আশ্বিয়াঃ ৩৫ :: [পড়ুন](#)]

“যখন তারা বিপদে পতিত হয়, তখন বলে, নিশ্চয় আমরা সবাই আল্লাহর জন্য এবং আমরা সবাই তাঁরই সান্নিধ্যে ফিরে যাবো।” [সূরা আল বাকারাহঃ ১৫৬ :: [পড়ুন](#)]

শাইখ মোখতার মাগরুবির একটা হৃদয় জুড়ানো সৌন্দর্যময় মনমাতানো আলোচনা শুনে ফেলুন...



মোখতার মাগরুবির আলোচনা :: [Going Back to Jannah : Mokhtar Maghraoui](#)